

欽定學政全書

欽定學政全書卷八

學政事宜

直隸一員 江蘇一員 安徽一員

浙江一員 江西一員 福建一員

河南一員 山東一員 山西一員

湖北一員 湖南一員 陝甘一員

四川一員 廣東一員 廣西一員

雲南一員 貴州一員

奉天府府丞 分巡臺灣道

順治八年題准。學臣歲科兩試俱週。禮部考覈稱職。御史。咨都察院。回道管事。道員。咨吏部。照常陞轉。其公明尤著者。特請優陞京堂。徇私溺職者。叅處。

又題准。學臣新舊相接。除御史報代。自有臺規外。凡學道兩考完日。先期報禮部。卽咨吏部銓補新官。依限赴任。面相交代。以杜署道諸弊。其舊官聽候考覈。陞轉處分。

順治九年題准。學臣歲科兩考。定以三年內報

滿方許陞轉。仍候新官面代。不許擅離地方。
順治十五年題准。各提學有能將上官勢要。封
函揭送者。於考覈時並爲敘錄。

康熙元年題准。學道任滿考覈。改隸吏部。

康熙二年題准。直省現任提學。於鄉試前接考
小半及一半者。所屬未考地方尙多。不便報滿。
應通行考試。以完下三年考試一週之數。其接
考大半者。准其報滿。

康熙十一年議准。新補學政。一經領

勅次日卽行赴任。至各省舊任學臣。考試已竣。俱於十一月內報滿到部。如違定限。卽題叅議處。康熙十二年題准。學臣考試遲延。限內不能完結者。降一級調用。

康熙二十六年議准。學臣缺出。無有一定。嗣後除鄉試後第一年接任者。兩考無誤。毋庸議外。其第二年接任者。春夏受事。則令作速考完。如期報滿。秋冬受事。亦令如期報滿。如果未能考完。將未考地方多者。許展限五箇月。少者展限

三箇月報滿。如於第三年接任者。料理科場事務。應俟下次三年歲科試完日報滿。

康熙五十年議准。學臣遇有丁憂等事。離任將學政印務。令該督撫或藩臬署理者。定例不許考試。其遇鄉試屆期。但照科考正案送場。署印不准錄送遺才。

康熙五十三年議准。凡學臣更替。定於鄉試年之秋。列名恭候。

欽點。以武闈後十月底到任爲限。舊學臣報滿。卽行

起程。

又議准。學臣經文武兩闈後。毫無所事。閒居候代。實爲曠職。嗣後鄉試年應更換學院道。禮部將更換之處。開送吏部開列具題。差定之後。新學臣速行赴任。舊學臣報滿交代。卽行起程。

康熙五十四年定。各省學道報滿後。該督撫於一月內。考核具題。如逾一月者。將督撫照違限例處分。

雍正二年定。湖廣分設湖南學政一員。湖北學

政一員。

雍正二年議准。江南幅員甚廣。士子衆多。學臣多以試期迫促。併日連場。未遑盡閱試卷。應照湖南湖北之例。於安徽添設學臣。分上下兩江考試。

雍正四年定。各省學政一體俱爲學院。

又議准。部郎等官。各有本任職掌。奉差督學後。原缺若不銓補。恐部中辦事乏人。嗣後奉差提督學政者。加以翰林院編修檢討職銜。其部內

原缺。另行銓補。三年任滿。考察稱職。仍俟伊本部員缺補用。

雍正五年奉

上諭。臺灣遠隔重洋。向來督學官員。難以按臨考試。是以將學政交與臺灣道兼管。朕思道員管理地方之事。又兼學政。未免稍繁。每年既派御史二員。前往臺灣巡察。應將學政交與漢御史管理。甚爲妥協。現今御史在彼。著卽辦理臺灣學政。嗣後永著爲例。

雍正七年議准。廣東學政一員。改爲廣韶學政。

將廣韶南惠潮五府并連州一州及所屬州縣共五十二學分與廣韶學政考試督察添設學政一員爲肇高學政將肇高廉雷瓊五府并羅定一州及所屬州縣四十五學分與肇高學政考試督察。

雍正十二年議准。學臣報滿時將歲科報部文武生員等第緣事開復遊學隨任等項及各款項併科冊報部後之革頂緣事開復補考補廩等項逐一備細造冊鈐印交與新任學臣其或

新任學臣未到。而舊學臣已經離任。向例將學政印信。交與巡撫代理。應令學臣於交印之時。將文武生員各項冊籍。一併交與撫臣。俟新任學臣到日。轉行交明。

乾隆元年議准。各部郎中員外主事。奉差學政者。照例加編修檢討職銜。將本任之缺。另行銓補。至陞轉食俸之處。應仍就該員原官。與各部現任司員一體食俸。遇應陞之時。吏部照例推陞。具題請

旨以陞銜註冊仍留學政之任。俟三年任滿回京。各照陞缺補用。再查郎中任滿。例應陞用道府。如遇陞選之時。准其以卽陞註冊。俟三年任滿。考覈稱職。再行歸於月分以應陞之缺。卽用。

乾隆十六年議准。裁汰廣東肇高學政。仍照雍正七年以前。統設一員巡歷考試。

乾隆十七年議准。福建臺灣府考校之事。向繫臺灣道管理。雍正四年改歸巡視臺灣御史。今巡臺御史。已定三年一次命往。事竣卽回。其提

督臺灣學政關防。仍令臺灣道兼管。

乾隆二十四年議准。嗣後學政遇丁憂事故離任。督撫等署理印務。倘遇鄉試之年。場期已近。新任學臣不能抵任。錄遺准其錄送遺才。武生亦照文生一體辦理。

乾隆三十年議准。嗣後各省學政報滿。必照例俟新任學臣到任交印。再行起程。其有對調及丁憂事故者。仍交督撫署理。

乾隆三十四年遵

旨議准學政養廉。各省所定原額多寡不等。查直隸江蘇安徽陝甘山東山西福建雲南原定四千兩。湖南原定三千六百兩。均毋庸另議增減。河南原定六千六百六十六兩零。爲數過多。廣東原定四千五百兩。浙江原定二千五百兩。加以學租。餘剩銀一千七百餘兩不等。共計銀四千二百餘兩。亦屬較多。應均以四千兩爲額。三省共計酌減銀三千三百六十六兩零。其江西原定二千四百兩。酌增銀一千一百兩。廣西原定

二千兩。四川原定三千兩。貴州原定二千七百兩。湖北原定三千兩。俱酌增銀至三千二百兩。尙餘銀一百六十餘兩。查奉天府丞兼管學政。每年原定養廉四百兩。應卽以此項餘剩銀兩。賞給奉天府丞。以資辦公。

生童齊集之時。尤易滋弊。且應考文生。倍於武生。文童又數十倍於武童。若定限先考武童。守候無期。更屬未便。嗣後學臣下馬考試。仍照例先文生。次文童。將文案發過。然後較試武場生童。先考騎射。次考策論。俾文武內外。場規肅清。乾隆十七年議准。直省學政考試。除陝甘地方遼濶。其邊遠府分例准歲科連考外。餘俱俟歲考周遍。始行科考。惟從前

特開恩科。間有題明歲科連考者。今湖南學政。既稱

恩科鄉試期迫。其未經歲試之辰州常德澧州岳州
四棚。應於鄉闈事竣後。補行歲試。每棚歲試畢。
卽兼行科試。但係添設

恩科。暫爲變通。不得援以爲例。

乾隆二十四年議准。各省考試武童外場。照武
闈鄉試之例。分別合式單好雙好三等。許入內
場。其不入等者。毋得概令入試。

乾隆二十七年。議覆廣西學政朱佩蓮條奏。生
員科考三次不到。照歲考之例斥革一摺。查生

員三年歲考一次。其文字之妍媸。品行之優劣。勸懲攸關。與官員考察大典相同。設有不到。卽應斥革。至科考錄送賓興。在學問素優者。自必奮勉應試。其文理平常。自揣考試不能前列。不應科試者。往往有之。伏讀乾隆七年

上諭。以學臣博寬大之名於科舉之外。遺才大收。一概錄送。致文理荒疎之人。皆濫冒入場。於賓興大典。甚有關係。是科考但當嚴其別擇。不必竣其規條。所奏應毋庸議。

乾隆三十五年議准。今歲舉行

恩科。湖南幅員遼濶。水陸程途。動經旬日。所有常德辰州沅州靖州四府。應照乾隆十七年之例。於每棚歲試後。卽兼行科試。一併造冊報部。

欽定學政全書卷十

學政關防

順治九年題准。提學官。須正己潔操。矢公矢慎。務得真才。不許曲徇情面。生員有荒疎庸耄者。卽行黜退。不許姑息。有捏造流言。思逞報復者。訪實照例問遣。若鄉宦勢豪。干託不遂。暗行中傷者。許徑自奏參處治。

又題准。提學官巡試各府州。務親臨遍泣。不許移文代委。及於隔州府分。調取生儒。以致跋涉。

爲害。亦不許令師生匍匐迎送。考畢。卽於本地
方發落。明示賞罰。不許攜帶文卷。於別處發案。
致令吏書乘間作弊。士子無所勸懲。違者題叅。
又題准。提學官奉

勅專督學校。督撫藩臬。不許侵其職掌。提學官巡歷
所屬。除教官生員。干犯行止。合行嚴懲外。不許
泛受民詞。侵官喜事。其生員犯罪。或事須對理
者。聽該管衙門提問。不許徇庇。致令有所倚恃。
抗拒公法。

康熙十一年議准。新補學政。一經領

勅。次日卽行赴任。如有逗遛都中。赴席宴會者。許科道官指名叅處。

康熙十八年議准。向來歲科兩考。積弊有十。童生未經府考。冊內無名。鑽求學道。徑取入學。巧圖捷便。一弊也。考試各府州縣衛所童生。額外濫取。撥發別學。明收冒籍。以占本學正額。二弊也。彌封編號印簿。及場內坐號紅簿。不發該府州縣封貯。私存道署。查對字號賄賣。三弊也。考

完一府不將紅案速行發學。任意遲延。徇私通賄。更改等第。撥下作上。四弊也。每考一處。令書辦承差快手人等。出入過付。暗訪生員。稍有家資者。先開六等草單。嚇詐保等銀兩。五弊也。文童人多額窄。武童人少額寬。或將文童充爲武童。入學之後。賁緣改文。娼優奴隸。濫行收取。真能騎射者。損而不錄。六弊也。各府地方設有考棚。憚於親臨。將生童遠調考取。各州縣告病生員。扛擡驗病。困苦難堪。七弊也。縱容無賴教官。

包攬生童。私通線索。效勞分潤。名曰作興。大壞風教。八弊也。曲徇上司。同僚情面。并京官鄉宦私書。及親戚朋友。隨住地方。討情抽豐。孤寒之士。棄而不錄。九弊也。開報學冊。將額外濫取入學童生。未經科歲兩考。預附三等。其姓名不入新案。造入衣頂下。以趙甲頂錢乙。混作實在之數。朦朧禮部。十弊也。嗣後學道考核時。俱注剔除十弊。若不能剔除十弊。該督撫指叅。內有貪贓之弊。照例革職提問。如無貪贓等事。照才力

不及例。降二級調用。其考核疏內不注剔除十弊字樣。及未曾剔除而注剔除者。或吏部察出。或科道糾叅督撫。照不報劣員例。降三級調用。督撫有需索陋規者。亦照貪贓例處分。至上司同僚。京官鄉宦私書。及親戚朋友。隨住地方。討情抽豐。暨州縣官傳遞私書。鄉紳投刺請席者。係官革職。係常人交刑部從重治罪。至順天學院任滿時。亦開明剔除十弊。具題考核。方准回院。若不能剔除。或有貪贓等弊。亦照學道例處

分。

康熙二十一年議准。嗣後學臣。凡到所考地方。量撥別縣書吏供事。其掌案長接名色。嚴行禁革。屬官一槩不許迎接。執事員役。不許退堂傳遞關節。如遇校閱之日。一槩封筒。不許傳入間有公事。俟試竣之日。方許開緘投進。其生童試卷。除正卷外。不許多備一卷。如有此等情弊。聽該督撫據實指名題叅。交部從重議處。如該督撫徇情。被科道官糾叅。或旁人出首。將該督撫

一并議處。

又議准。向來考試地方。各州縣官。指稱供給名色。私派甚多。或按丁徵收。或逐戶科斂。每考一府。費民間數千餘金。嗣後應嚴行禁革。如有私派照舊累民者。許該督撫指叅。交部從重議處。康熙三十一年。議准。學臣有將祀生贊禮。濫行批設。考試生童。徇私賄錄。至於劣衿學霸。包攬武斷者。不行究斥。行誼修明者。不爲表揚。統令該督撫題叅。交部從重議處。如督撫徇私。事發

一併議處。

康熙三十九年議准。學臣考試。督撫藩臬各道。勒索陋規。及學臣濫與者。俱革職提問。如有勢宦京官。請托投札。及教官巡捕。進士舉人說情。并書吏皂快等討賞等事。有官者革職。無官者從重治罪。若學臣徇情市恩者。亦革職一併提問。知府如有包攬入學。要挾措勒。及將文理不通之童生送考者。或學臣申報。或督撫查叅。將知府革職提問。學臣與提調知府。扶同作弊者。

一併革職提問。督撫不行查叅。學臣不行申報者。俱革職。

又議准。督撫如有藉名開送童生者。照勒索棚規治罪。州縣官賄薦案首。及各官効勞分肥。提鎮等官說情。并學臣扶同者。事發俱照例治罪。學臣遇有挾制干請者。准徑實封奏。

聞。若祖父兄弟爲子孫營謀者。除本童責革外。祖父兄弟。有官者革職。無官者從重治罪。

雍正五年議准。嗣後學院所帶吏役。酌量足用。

不許冗濫。至承差號吏。亦封在場內。不許容留。一人在外。所有一應收發公文。催買供應等項。悉委提調料理。如有吏役在外招搖撞騙。許提調卽行鎖拿。從重治罪。

乾隆七年議准。各省學政宜守一定之儀制。勵師表之風。裁不得自損名節。取悅督撫。亦不得因督撫所取之生童。府州縣錄送之首名。不問優劣。瞻徇情面。概行拔取。至督撫之於學政。無論由何項官員出差。但當以公正廉明相勗。不

得以勢位意氣相凌。崇師儒而杜請託。有稽察而無挾制。庶體統得昭。官常可肅。

又奉

上諭。各省學政考試生童。爲士子進身之始。甚有關係。爲學臣者。固當各矢公慎。嚴密關防。而在外棍徒撞騙之弊。地方官尤宜嚴行訪查。以期肅清。近江西巡撫陳宏謀奏稱。江省積棍。每年尾隨學臣按試各郡。假冒學臣親戚內幕。哄誘士民營求入學。講定謝儀若干兩。一同包封。仍存士民之手。俟

案出有名。方來取銀。營求之人。見其不先取銀。以爲有益無損。遂將銀兩付伊包封。畫押。棍徒預用錢文。假作銀封。臨時同夥設計。掩飾調換。攜銀潛逃。名曰掉包。迨至案出。無名。士民啟視銀封。方知墮計。而棍徒早已遠颺。在被騙者既不敢鳴官。以取累。又不敢告人以貽羞。遂致此風。各處多有。不能杜絕。朕思一省若是。他省亦相同。著各督撫等於學臣按試之前。將此等掉包串騙之弊。詳明曉諭。凡有指稱營求考取。將銀封貯。出案收取者。無

論真假。立即嚴拿究處。并許被騙之人。報官查拿。則應考生童。識破機關。自不致墮其術中。而棍徒知有法紀。亦不敢公行無忌。亦肅清學政之一端。該部卽遵行。

乾隆十二年議准。學政按臨地方時。原當謝絕本地紳士往來。以杜招搖撞騙之弊。但恐各省學政或因試事已畢。無復嫌疑。因而拜望鄉紳。及同年故舊者。亦未可定。應通行嚴飭務遵定例。凡按試各郡。考畢之後。將拜望鄉紳親故之

習。概行禁止。

又議准。學政關防考試。如有暗通關節。弊生於內者。責之學政。招搖傳遞。弊生於外者。責之提調官。一經發覺。各照例處分。

乾隆十五年奉

上諭四川總督策楞查奏朱荃賣書漁利勒索告病告頂生員銀兩。并自奏平時未能覺察。請交部嚴加議處等語。朱荃蔑倫匿喪。據報失足落水。朕知其必有營私舞弊之處。嚴諭究查。策楞始將前後

婪取贓款覆究。但未究明賄賣生員實蹟。據湖廣
總督永興等。審據朱荃家人供賣生童九名。又收
受李爲棟銀兩貂套等物。卽將李姓童生二名並
取入學。贓私纍纍。策楞何以全無知覺於事先。並
未究出於事後。從前學政多簠簋不飭。後經責成
督撫。不時稽察。一經彈劾。審實。卽按律正法。其風
始戢。近來漸有顧惜情面之意。並不實在留心體
訪。以致學政等無所忌憚。故習復萌。竟敢公行賄
賣不法已極。此風漸不可長。策楞身在地方。朱荃

所爲狼藉如此。本俟定案時嚴治策楞失察之咎。今旣自行檢舉。若因此卽稍爲寬宥。益無以爲督撫查察不實之戒。除現令該部嚴察議奏外。所有朱荃之弟及伊家人。俱解交該督。并案內賄賣生童。及經手說合各犯。逐一秉公嚴審。嗣後督撫於地方學政。如不時加確查。據實叅奏。經朕訪聞。或臣工奏劾。必將該督撫嚴行議處。斷不姑容。著通行各督撫知之。

乾隆十七年奉

上諭。國家設科取士。期得真才。士子誦法聖賢。當知以名節爲重。始進不端。則爲衣冠中敗類。至於列掄選之任。而懷穿窬之心。則更衣冠中禽獸矣。玷儒林而壞士習。莫此爲甚。是以禁令綦嚴。凡使人重懷刑。不犯有司。正以慎掄才大典耳。近科來特申懷挾之禁。勿使魚目混珠。意內簾弊竇。久已肅清。不謂尙有潛通關節其人者。雖千百人中。僅止一二人。然此一二人者。未嘗非千百中之人。況此特其敗露者耳。其默識心存。無能發摘者。謂再無

其人其孰信之。夫刑章國憲。持世之大防。從前學政賄賣生童。若俞鴻圖喀爾欽。皆經正法。朱荃未及明正典刑。而賊私盡已發覺。案犯俱已治罪。雖功名之途。不無熱中。而效尤頽風。將何底止。吹噓翦拂。流爲植黨營私。故釣名者甚於市利。法所不容。朕雖欲曲宥之。豈不計及世道人心乎。蔡時田曹詠祖已照法司律擬卽行斬決。至宦家子弟。鄉科以官卷邀恩。及會試入闈。同年同官。情面相關。囑託響應。勢尤易便。身居朝列。不以正率先冒犯。

營私此而不懲。更無以服寒峻而昭炯戒。曹秀先
一併交部嚴加議處。科場有此。深爲可愧。朕固不
忍輕量天下士。而人心叵測。不能無於予改是之
歎。倘尙有以身試法者。亦惟有按律從事。刑茲無
赦而已。士子讀書立品。安命待時。力田逢年。必有
其候。考官虛公秉鑑。當念爲國樹人之義。何至苟
且夤緣。甘蹈重辟。卽倖逃法網。而踰牆之醜行。已
爲人倫所不齒。况當光天化日之下。作此如鬼如
蜮伎倆。自作孽不可追。天地鬼神。必不容欺。其可

不知所戒哉。

又奉

上諭。本日勾到情實官犯。內李爲棟。王瑞霖二犯。因
賄囑朱荃。爲伊子營求入學。本按以財營求與受
財人同科。問擬絞候。已屬該部輕爲出脫。至策楞
擬以緩決。更屬沾名曲庇。著交部嚴察議奏。蓋入
學乃士子進身初步。原與科場一律。營求賄囑之
風。斷不可不嚴爲防範。在輦轂之下。糾察嚴密。易
於敗露。至各省學政出京赴任。途次接見官員。乘

便密行賄託。其事甚易。孰從稽察。似此情罪昭著。犯証確鑿之案。若不明正典刑。將來玩法之徒。益無忌憚。且今歲科場。搜出關節。既伏厥辜。至殿試策名大典。復有預擬策條。懷挾應試者。條對策問。若僅完卷塞責。較之三場。乃甚易之事。尙需宿構。懷挾。則其鄉會中式時之舞弊。不問可知。朕特未加深究耳。可見衣冠中不少敗類。實出尋常意計之表。敗類者如此。其微倖入彀者。益難信其必無矣。比聞新進翰林輩。視交通關節。竟不以爲惡習。

可恥。偷爲一切。真才益淪。力挽頽風。朕不辭也。此而可寬。明刑弼教之意。安在。李爲棟。王瑞霖。二犯已於秋決內。予勾正法。並將此嚴切曉諭中外知之。

乾隆三十二年議准。學政衙門書吏。按照定額八名。召募充當應役。五年役滿。另募接充。仍將現役姓名年貌籍貫三代。及著役日期。備造清冊。取具該衙門并無違礙印結。於每年歲底。咨報吏部查核。

欽定學政全書卷十一

學政按臨

順治九年題准。提學出巡。半月前。行巡視學校牌。三日前。行起馬牌。各提調教官。遇巡視牌到。將應考生童冊籍。及應行事宜。逐一備完。府提調官。遇起馬牌到。將應考生童數目。開揭送核。卽就近調取生童。可足兩場者。候考。其餘候下馬日。品搭定期。出示調取。免致官生久候。經臨地方。巡捕官量率兵快。於交界處防護。

勅印其餘夫馬按臨伺候不得另批迎接官吏師生
不許出郭迎送程途非六十里不得備辦中火
每飯葷素不得過五器有驛州縣及非宿站不
必另送下程吏書乘馬自行上下貼轎近行馬
夫先送雨具不許近前兵快執肅靜牌於執事
前迴避牌於吏書前如遇紆途曲巷有潛行探
聽乘機餽送吏書者卽行拿究有容令跪道投
書稟見者巡捕員役重究該州縣原係何官巡
捕不許代替如違提究按臨下馬先將巡捕官

及修理衙門委官職名。巡視人役姓名開揭送查。一駐劄衙門須寬大。可試千餘人。高垣厚壁。環覆以棘。不許故留水道穴隙。及假墻虛壁。一切弊竇。吏書房不得近廚廁。不得近巷市。仍各總界一門。門各異鑰。鑰各異牌。總貯一匣。以時啟閉。抄案門皂等房。不許與外房相接。須隔一墻。各備行竈淨器。後堂正房。務整理潔淨。一間安置床帳。一間置淨几六張。石硯筆墨水注。鎮紙燈臺燭架俱全。堂上平鋪地板。公座紗厨。

架高三尺。稍前置小公座。以便接見。堂下置水缸二。長盤四。磁礮十。以便倒換。試場須高敞堅密。可蔽風雨。不留空隙。不纏柱結彩。堂外甬道東西。以千字文橫列編號。每額懸粉牌一面。大書某字號。懸燈於上。考案前後左右。相去各二尺。上置界尺一。下置淨器一案。脚用長竹編結。以防移動。仍貼某字幾號於案上。盡號止。卽照案數置坐號籤。東西分爲二筒。每一號爲一束。又備造一冊。務令冊對籤號。籤對案號。於學政

到日呈送。不許遺漏差錯。堂左設案二。候放出題等書。及照出手牌三十面。旁設大雲板一架。堂右置長凳四。圍屏二架。以便官吏暫處。堂東西壁各備出題長柄牌六面。提牌八面。小公座前。置長案一。鋪氈於上。北首放移席。換卷。丟紙。說話。顧盼。攪越。抗拒。犯規。吟哦。不完。小印十箇。總盛一匣。印色俱全。中放東西文場坐號籤筒。南首留與教官用印。兩旁設受卷長案各一分。置各府州縣學坐牌在上。每案各置界尺四。呈

文紙五十張。筆墨硯各一。照進長柄粉牌二月
臺。設小雲板一架。連槌。在飲茶桌前。飲茶桌一
張。橫放。置茶四大壺。薑湯二壺。上用紙貼。明開
薑茶字。茶鍾六箇。冬春備火盆木炭。相連。又設
桌一張。直放。上置飲茶小印一面。印色全。界尺
四。以便放卷。相離五尺。甬道中。又設木柳一架。
連槌。在出恭桌前。出恭桌一張。橫放。上置出恭
小印一面。印色全。界尺四。以便放卷。文場四隅。
各置粗壯桌一張。銅鑼四面。以備巡綽人役站。

立瞭望左角門邊。席圍行竈中備食盒水缸水桶及碗碟等物。合用水菜俱全。右角門邊置淨桶四箇。俱用蘆蓆編棚。約高四尺。上不用蓋。以便遠觀。不許附近外墻。二門內。大門外。各設大鼓一面。前堂後堂高燈八座。甬路掛燈八盞。二門大門高燈各四座。二門內兩邊。暫用圍屏遮蔽。設桌凳。以備官吏輪流憩息。事畢。照數給領。其合用五經四書性理通鑑綱目及小學武經七書等書。教官先一日呈送。完日領回。一憲

綱冊。凡不關學政者不必槩造。其式首提調正官。次佐貳首領履歷。教官備造履歷。仍開習某經。各官下註在任公出等字。以便接見。見時免用手本。次鄉賢名宦。見在祀者。各爵里姓名行實。并奉到某督學明文。次旌獎過孝子順孫義夫節婦各姓名年歲籍址行實。係何人舉報。并奉到某督學明文。次先聖先賢祠墓。次鄉士大夫。各開履歷爵里名號。及現任致仕丁憂養病等項。及舉貢監生。舉人仍註某科。次有無山林

隱逸懷才抱德之士。次請舉鄉飲賓介行實姓名。及某人保舉。次射圃社學鄉約址所。教讀約正副姓名。次學田地畝。屋房租稅數目。次本郡州縣山川圖誌。名賢著述書籍。碑刻古蹟。以上各爲一欸。一格眼冊。提調官督令該學查照舊式。將通學生員年貌籍貫三代所習經書。及某年月日入學。某年月日考取幾等幾名。中間補廩補增停降發社收復科舉。及丁憂緣事改名。給假患病等項。挨年月開明。內廩增附青社。

各以資次爲序。廩停未降者附廩未降增附者列增附前。增停未降者列增後。降附者列附前。緣事者要見曾否歸結。患病給假者原限何時復學。丁憂者何時服闋。累次未經歲考者原係何因。改經改學改名者。原入何學。原習何經。原係何名。問革者奉何衙門批問。俱令各生親筆填注。不許吏書代書。中有差錯。各生任之。惟患病給假。許吏書查實代書。候本生復學。用紙大如格眼。親書繳送。以便更貼。其文武生寄學者。

亦照式填注冊末。凡舊案有名。今中式。應貢告
老病故。援例等項。未經除名者。俱明白開款。附
於冊後。上用提調印。下用儒學印。候考校牌到。
一月內。差人解閱。如有錯漏增減。及隱匿事情
者。教官議處。吏坐贓究革。按臨到後。有告改名
改經者。一切禁止。以省混擾。一便覽冊。開造
通學生員若干名。內廩增附青社等項各若干
名。見在聽考若干名。丁憂患病等項若干名。必
總撤相合。其前案幾等生員若干名。賞格幾何。

行優行劣幾名。童生入學。儒士科舉各若干名。送考遺才若干名。止具總數。併五科內鄉試及十年內所出過題目。候出巡下馬日送。一按臨下馬。執事卷損。暫止大門外。俟輿夫出。守門官吏暫閉大門。學政先入。安置印匣。巡捕官入後堂。周視各房牆垣。封鎖書吏出堂。巡捕官同押損官驗交卷損。次皂隸繳執事。次地方官送聽事員役。及柴燭等項。驛官送廩給鋪陳。總具一冊。巡捕官搜檢畢。乃收入。學政更衣升堂。守

門吏啟門。各官吏師生序進。逐起稟見。各官師生行兩拜禮。舊規免拜者不稟拜。各官遞一應文冊見畢。各回。不再見。巡捕官率兵快晝夜巡邏。但有沿牆窺竇。拋磚擲瓦。及行走踪跡可疑者。卽拿送究。新到星相醫卜面生之人。驅逐不容留住。如違。巡捕官責治。地方歇家鄰右連坐。

一按臨次日。祇謁

先師。官吏師生禮生。止於櫺星門伺候。一躬不稟接。行禮畢。升明倫堂。官生以次揖見。應坐者照憲

網序坐。講書生員。總出班一揖。西向立。講畢。以次下堂。東向立。俟行賞罰畢。官吏師生先出。不赴謝。是日。學政衙門投文畢。放告。巡捕官役搜檢明白。放入。事不關學校者不准。與生員有隙。故行捧扯者。責究。一駐劄處所。初到日。照常送米麵一次。以後發簿照數辦送。各該調考州縣。不許另送下程。如久住處所。柴炭油燭及門皂柴米。俱酌定數目。五日一送。筆墨紙張。候票取方送。送進物件。巡捕官細搜。如遇考校日期。

生儒供給。俱先一日送進。每名大餅六枚。水果四枚。夏月加西瓜半箇。卽置考桌上。教官仍給飯一餐。務俱精潔堪用。有以惡濫冒破官錢。該吏坐贓問罪。各員役供給。亦先日預貯。各州縣同日考者。先期扣算。合用銀若干。會同總辦。以免偏累。事畢。通前公費。及一應修理衙門。置辦器皿。給賞花紅紙筆之費。一併造冊。各具總撒數目若干。候起馬日呈報。以憑察覈。一每日辰時投文。申時領文。守門吏領出印信號簿二。

一登記發行公文。一遇各衙門遞到公文。先檢無磨洗折動夾帶私書等弊。方許登記。詳驗批文各幾角幾件。巡捕官印驗訖二字。付原役投入。解審補考比銷各隨牌入鋪遞公文。亦照前登記。每日門吏各注姓名。以備稽察。如員役刁難需索。許稟拿問。其考試閱卷之日。一應公文。俱巡捕官驗送駐劄州縣。登簿收貯。每一日總爲一束。候發落完。彙開手冊送進。有批迴者。該衙門徑注收發批。候發落完日彙送。一應書札。

徑自阻回。有緊急事務。傳鼓稟入。非緊急事。不得傳鼓。

雍正十年議准。查舊例。學政按臨次日。祇謁先聖畢。卽詣明倫堂講書。嗣因官吏師生叅謁。恐滋弊竇。改俟入場事竣。再行詣學講書。但考試既畢。人數無多。聽講者寥寥。嗣後應仍照舊例。學政按臨次日。詣學行香。卽行講書。

乾隆十一年議准。學政按臨初到之日。預計考期遠近。日用薪蔬數目。約發價銀。交提調官委

人辦送事畢。造冊核算。不得收取供應。至於沿途護送人夫。住宿處所。以及考棚應用什物。學政槩難自備。應仍令地方官遵照向例辦理。

乾隆三十三年奉

上諭。鄂寶查奏梅立本按試各屬。較前任學政通計多用夫七百名。又粵西各屬。每棚另有捐項六十兩。爲書役飯食。現在籌酌開欸。另行妥議等語。梅立本鄙瑣不堪。任意濫取。擅作威福。逼死縣令。已於另案治罪。至於學政按試衡文。原應輕騎減從。

不可絲毫擾累地方。卽例有按臨夫馬之說。祇爲護送勅印。及必應隨帶之文卷官物而設。爲數亦屬無多。且各省學政。厚與養廉。其隨帶之行李。及攜行之幕友家人。所用夫馬。理應自備。豈可借卷箱之名。濫行需索。若一切應用夫馬。仍取給有司。則各省督撫等養廉甚厚。豈遇有公事。巡行各屬。亦槩令屬員供應夫馬耶。梅立本在粵西如此。各省情形。雖未必盡同。或亦有如梅立本之濫用夫馬者。各督撫未免存官官相護之見。不肯查辦。縱

容日久。遂致積習相沿。因有梅立本需索逼命之事。此風斷不可長。著通諭各督撫。查明各該學政。按試時。有無擅動驛馬。多少若何。及似梅立本之多用人夫者。或間有自行僱覓之處。並各學政養廉若干。現在情形若何。卽行據實具奏到日。再降諭旨。至於學政書役。各有例給工食。其飯食豈可令地方官捐備。亦屬非體。並令該督撫一併查明覆奏。遵。

旨議准。查學政赴任。兵部按照品級。給與勘合。沿途

地方官照數供應夫馬。至學政在任。按臨各棚考試。有護送

勅印兵丁馬匹。扛抬文冊卷箱人夫。其餘隨帶鋪陳。及家人幕友。一應夫馬船隻。例應自行發價僱覓。並無地方官供應之條。今據各督撫遵

旨覆奏到。直隸等十四省。向係學政照例自備。惟廣西。湖南。雲南。貴州。四省。官爲供應。實屬積習相沿。應嚴行禁止。一體責令自行發價僱用。至各省護送

勅印扛擡文卷官物。夫馬船隻向無一定數目。易啟濫索濫應之弊。嗣後學政考竣一府。卽將無關緊要文卷。封交提調。徑送學政衙門。其必應隨帶文卷冊箱。用夫十二名護送。

勅印用馬四匹。水路備船一隻。如路徑崎嶇。應加夫四名。水路或遇灘險之處。加小船二隻。以爲定數。俱在驛站夫馬船隻內撥給報銷。此外有濫索濫應。并短發價值。及給價之後。州縣繳回學政收受者。該督撫察出。據實叅奏。如督撫徇情。

不舉。別經發覺。一併嚴加議處。再各省考棚。一切應用官備之物。及學政衙門額設書役。例給工食。原應酌動公項。報部核銷。不得令地方官再行捐備。

欽定學政全書卷十二

考試場規

順治九年題准。試日用印卷受卷散籤給牌官。東西各一人。以教官充。供給巡綽官各一人。司儀門啟閉官一人。以州縣佐貳或府衛首領官充。書吏四名。管寫題畢。以二名司茶。二名司恭。司茶者兼管受卷。司恭者兼管封卷。司照進照出牌官二人。以巡檢大使充。厨役二名。巡綽瞭望快手八名。分爲二班。外用巡捕官二人。以佐

貳首領官充。報名門吏二名。試日。二吏把門。搜檢官二人。以衛所官充。帶領民壯二十名。軍牢二十名。分東西搜檢。其寫題受卷封卷。以受卷官督理。司恭司茶厨役。以供給官督理。巡綽瞭望。以巡綽官督理。前一日。皆開具姓名冊呈驗。仍於隔別州縣。分撥二班。以備臨期調換。各員役。日午給飯一餐。候飯熟。供給官稟明。二門內擊鼓三聲。督率內班皂隸。用食盒散給。以上除職官原有職守。各吏役人等。須擇忠實勤敏者。

送用。如有受賄傳遞等弊。事發併生童一體重究。提調官亦不得辭責在內。各員役每名仍各與事例一本。俾將本等執事演習慣熟。無至臨時講張差錯。試日漏下五鼓。外巡兵壯舉放號礮。以便諸生齊集。執牌吏將生童照次排齊於大門外。候門啟。提調官入。至儀門止。吏舁卷箱隨入。巡捕官帶民壯軍牢立儀門外兩旁。先將執事官廩保內搜檢員役點進。生童各持筆硯水注。隨牌聽點。州縣官於大門外照冊唱名。隨

牌引至儀門外。魚貫序立。搜檢官連唱仔細搜檢。兩旁齊應。二人對搜一人。搜畢。提調官點名給卷。仍令同列辨認。互相覺察。如有懷挾片紙。隻字及金銀等物。或冒籍頂名代考者。本生照律例問罪。枷號。搜獲員役。重行獎賞。執照進牌官。引二十人至公座前聽點。用隔別州縣軍壯。覆搜。若搜出情弊。內搜檢員役。破格獎賞。外搜檢員役。究贓重治。搜畢。印卷散籤。教官在小公座前。夾直放長桌。東西相向。照點冊唱名。本生

高聲答應。隨以卷呈東立教官案上。用督學印一顆。西立教官信手掣籤給本生。卽令吏書坐號於卷面。書姓名於坐號冊。東籤者東下。西籤者西下。各認號就坐。如已得籤。往來行走。故不進號。及已就坐。東西觀望者。扶出黜退。進畢。內搜檢官役出。提調官教官。繳點名冊。計入考若干名。有不到者。大書不到二字於本名卷上。以空箱及鎖匙同繳。提調官領坐號冊。率外搜檢官役出。巡捕官稟領大門鎖鑰。檢點大門內二

門外並無一人。方從外封鎖。次司儀門官將儀門封鎖。鎖畢。堂上擊雲板一聲。堂上下皆肅靜。吏執題目牌。於甬路上下行走。俾其熟視。短視者。立稟教官。將題高誦二三遍。不許往就。兵快輪班登案瞭望。凡遇各項犯規。認定行次面貌。鳴金一聲。高稟某字第幾號生童犯某事。本生自持卷赴堂印記。二人共犯。二卷同印。抗拒者重究。如犯規不舉。及不犯妄稟者。官役重究。已時。供給官稟明。二門上擊鼓三聲。方許飲茶出。

恭。飲茶者趨飲茶桌。自擊小雲板一聲。東坐者放卷於桌之東。西坐者放卷於桌之西。司茶吏印飲茶二字。飲畢。領卷自擊雲板二聲。復位。出恭者趨出恭桌。自擊木梆一聲。亦各東西放卷。執出恭牌於甬路中行。司恭吏印出恭二字。恭畢。領卷自擊木梆二聲。復位。二生不許並出。偶有並出。稍後者於甬道拱立。待先者復位始行。攪亂者。及不交卷。不擊梆。領牌不由中行者。候恭候茶時並立接談者。俱印犯規二字。飲茶出

恭止許一次。重出者不准。卷面仍印犯規二字。但有一人交卷。卽撤去飲茶出恭桌。是日各執事員役須肅靜。不許輕出一聲。以亂文思。惟未時。大門外擊鼓三聲。堂上巡綽官擊雲板三聲。呼快膳真。申時。大門外重擊鼓四聲。堂上擊雲板四聲。呼快交卷。申末。大門外重擊鼓五聲。堂上擊雲板五聲。不論已未膳完。俱交卷。不交者收卷扶出。決不給燭。其原給號籤。同卷交還。把大門官務要依時擊鼓。不許亂擊。以混聽聞。交

卷時。司儀門官督率執事官二員。候立儀門內。一收照出牌。一司啓閉。受卷官東西各一員。督率受卷封卷吏四名。分立桌傍。照各府州縣坐牌交收。交卷時。本生即將浮票扯下帶回。受卷官每收一卷。先檢閱卷面背。如不扯浮票。或書寫姓名門第關節。及卷內夾帶片紙者。不許給牌。即時稟究。篇數不完者。印不完二字。卷上有犯規等項印記者。不許給牌。將卷仍付本生執立堂下。候出盡。查係移席換卷丟紙者。生員黜

退童生責懲餘弊。生員閱卷定奪。童生卷屏不閱。受卷官督各吏將所收卷。每學以十卷爲一束。三束爲一封。注明某學三十卷。某官某吏封送判。收貯各卷箱。生童領牌。從甬道中直趨儀門。候三十牌足。司儀門官稟請鎖鑰。開二門。收一牌方放一人。無牌者卽係帶出試卷。司儀門官拘留稟究。如交卷時。值牌盡。執卷立候。已收足三十牌。巡綽官公同數明。繳上原桌。高聲稟收牌訖。擊鼓一聲。大門外巡捕官亦擊鼓一聲。

從外開鎖。門止半開。逐一放出。把大門官吏。不許入闕內。儀門官吏。不許出闕外。違者嚴究。凡開大門放出。如容閒人在外探聽。并潛入大門內者。各員役究贓重治。生童出盡。收卷官計算。收過籤數。與散過籤數。有無多寡。收過卷數。與送考人數。有無異同。查算明確。稟請點名冊。填送察覈。生員試畢。次日免謝。各還寓所。靜聽發落。如發落稍遲。候牌示暫回。臨期調取。

雍正十一年議准。嗣後生童坐號紅簿。印畢卽

封交提調收存。如學政有賄留坐號者。或經督撫訪查。或由提調申詳。卽照定例議處。

乾隆十九年議准。直省學政考試。遇州縣應試人多。府考事竣。提調官預將取錄童生總數。申報學臣存案。以杜造冊送院時。胥吏受賄。攬入冒籍互考姓名之弊。學政按臨。提調官按應考人數。刊刻坐號戳記。投納學署。催齊童生。試卷於卷面加貼浮籤。開具姓名。鈐以印信。半在卷面。半在浮籤。於卷後用小字編號。折角固封。生

員卷。鈐敎官圖記。童生卷。鈐州縣官印。再蓋以提調印。是爲彌封字號。更置彌封冊。將生童姓名籍貫。並卷後編號。詳載於冊。封貯提調公署。試日。候學政門初啟。卽具點名冊。連卷箱一同投進。學政於二門內。東西文場適中之地。設公座。兩旁各設長案。每案酌量多寡。委敎官數人。生童點名給卷時。不鈐學政關防。不別設號籤。書卷面。以致延誤晷刻。但取提調官所進坐號戳記。攪亂分爲數盤。配以印色。各置兩旁案上。

仍各設空盤備用。提調官於大門外點名。每二十名一牌。引至二門。聽唱名。魚貫而入。學政堂吏給卷。生童領卷後。單名向東案。雙名向西案。教官各信手取坐號。鈐於卷面。隨以用過之號。別置空盤。生童認坐號就坐位。點名畢。學政以點名冊發出封門。教官以餘號及點名不到之卷。封繳學政。生童試藝既畢。自揭卷面浮籤。交納試卷。各記明坐號。候啟門出。學政閱卷取錄。止憑坐號發招覆團案。覆試已定。生員於等第。

全卷。童生於取錄各卷。均鈐學政關防。發交提調官。拆出卷後編號。驗與編號冊姓名相符。然後填榜發案。

乾隆二十三年議准。考試生童。定例於五鼓點名。申刻淨場。不論已未膳完。俱令交卷散出。決不給燭。恐日久法弛。學臣或博寬厚之名。以致暮夜滋弊。嗣後應恪遵題定場規。如有因給燭滋弊者。將違例之學政議處。

乾隆二十九年。議覆廣西學政葉觀國條奏。考

試生童。派巡查內場官員一摺。查向來考試無
佐雜並處內場之例。緣此項人員多非正途出
身。不諳場規。且有外場供給巡綽照進照出巡
捕等差。勢難分派內事。每府教官多或二十餘
員。少亦不下十餘員。皆素諳規條。學臣擇其精
明之員。儘足敷用。若另派佐雜專司。則各該教
職勢必藉詞諉卸。而佐雜一人不能週徧。轉滋
弊混。所奏應毋庸議。

欽定學政全書卷十三

生童試卷

順治九年題准。生童試卷。各照定式置辦。不許
長短不齊。卷面三圈。上圈。書府州縣。中圈。生員
書廩增附青社及武生。童生填文武童。下圈。書
習某經。接縫處。上用提調。下用儒學。各印鈐蓋。
提調官置印信方簿。一樣二扇。面開某府州縣
生童號簿。內開送考各生童姓名。生員注廩增
附青社等字。人各一行。各名上留空白二寸許。

以備填號。仍照千字文置籤一筒。將形音相似。如水水王。玉宇雨辰。臣之類。除去不用。考前一日。提調官信手抽籤填簿。照號填於卷背後。用教官印鈐蓋。摺疊彌封。再用提調官印鈐蓋。卷面加浮籤。書姓名。黏第三圈下。旁留少許。以備填坐號。填號處。仍鈐提調印。半在卷。半在浮籤。用印畢。將號簿固封提調處。其生員點進手冊。照廩增附青社次序開造。臨期提調官於大門外。每二十名爲一牌。唱名序進。二門外搜檢散。

卷每二十卷爲一封。上書某學第幾牌試卷。鈐印總置卷箱。散訖。將空箱連鎖鑰送進。童生各式俱同。惟序進查照廩生結狀彙造。以便識認。教官試卷提調官備。卷面明書職名。願科舉者與生員一體編號。

雍正十一年議准。從前府州縣院考吏書人等辦事。需一月有餘。伊等飯食。以及雜費。不入正項奏銷之內。例皆取給於卷價。而該管官遂招立卷戶。平居衙署之糊飾。臨時所送識認之試

卷皆索之卷戶。於是明索高價。苦累生童。嗣後府州縣以及院試。無論大中小學。每本試卷定價三分。令該提調官自行辦置。不許再招卷戶。其紙價工費之外。盈餘卷價。卽爲辦事書吏人等飯食之費。若再立卷戶。仍前增價。查出照例叅處。

乾隆二年奉

上諭。安徽應試童生。有完納卷價之陋例。其費彙交知府直隸知州。除修葺考場外。其餘則補學政養

廉之不足。雖每童所出。不過錢數十文。而在貧寒書生。亦不免拮据之苦。且學政養廉。朕已特頒諭旨。加增。更不必取資於卷價。至於修葺考場。乃地方公事。應動存公銀者。著將童生交納卷價一事。永行禁止。毋使不肖官員。及吏胥人等。借名苛索。致滋擾累。

乾隆三年議准。士子各專一經。或習多經。卷面自應預行填註。若止憑就試之日。隨意填寫。則趨熟避生。適長僥倖之習。應令諸生於納卷時。

卽自行填註。其有卷面未填者。縣不送府。府不送院。或所作經義與卷面不符者。雖多篇。概不取錄。

乾隆十一年議准。嗣後湖南童生應試。悉令自行置卷投交。其提調官所收卷價三分。照安徽之例。一體永行禁革。并行令各省。將卷價永行禁止。再禮部從前所定卷價三分。除應給紙張工費外。所餘原屬無多。惟是府州縣吏胥借名多索。以致士子措價拮据。今官辦卷價。已經革

除則吏胥積弊。尤應嚴禁。應令督撫轉飭該地方官嚴加禁約。毋使吏胥人等。借報名收卷造冊等名色。仍行需索。並令該學政。不時查察。以防弊端。

又奉

上諭。學政考試卷價。自雍正十一年。經部議定。每本價值三分。令提調官自行辦置。不許卷戶仍前增價重戮等弊。自應遵照定例辦理。今崔紀奏江蘇等屬。卷價浮多。有貴至一錢及二三錢不等者。寒

金匱要略卷之四
士未免拮据。此皆由書役舞弊巧取。該管官不行查察之所致。著該督撫學政等通行各屬。嗣後童生府州縣以及院試卷價。令依部定之例。毋得違例多取。如有仍蹈前轍者。著該督撫查出。分別究治。

乾隆二十四年議准。科場試卷多有點勾勾股。違式貼出者。其故皆由學臣考試。令諸生自行勾點。便於披閱。是以積習相沿。及至入場。新進之生。每相沿岐悞。應通飭直省學政。不得仍令

諸生點句勾股。俾諸生熟諳無訛。

乾隆二十六年議准。向例生童試卷。卷面中間三圈。上圈填某府州縣。中間生員填廩增附青社字。下圈填某經。雖學臣衡鑒。祇憑文字之優劣。而廩增附等字。已顯然在目。倘不能悉泯成見。卽未能鑒空衡平。嗣後生員卷面。只註明府州縣學。及所習本經。其廩增附等字。無庸先行區別。以昭嚴密。

乾隆二十八年。議覆福建學政紀昀條奏緣事。

戒飭生員。宜分別考試。於歲考時。卷面坐號之旁。加用曾經戒飭。及戒飭自新紅印。以憑酌量降等。及宜復點勾股之舊例等款一摺。查學臣教督生員。考試以衡其文。優劣以覈其行。二者不可偏廢。而因文相士。亦不致大相逕庭。若果有劣行之生。當時卽行斥革。不准與試。其有罪不至於斥革。而曾經戒飭者。或有戒飭而能悔過自新者。亦無錮蔽終身之理。若於歲考卷面。加用紅印。酌量降等。則無志之徒。明知改過

之後。仍不能湔滌前非。安心遊蕩。於訓士之方。無補。至試卷點勾股。雖無關弊實。但鄉會試卷。原無此例。而諸生習慣相沿。往往悞干貼例。是以將小試之卷。一併禁止。蓋文之工拙。在乎司衡者之鑒裁。不必遽更成案。所奏均毋庸議。又議准。歲科兩試。生童試卷之末。俱令本人自填添註塗改共若干字樣。毋得遺漏。

乾隆二十九年議准。將生童試卷。自寫塗註字樣之例停止。

乾隆三十八年議准。嗣後貢監錄科照生員之
例。卷面上只註明府州縣學及所習經書。其恩
拔副歲監生等字樣。概行禁止填寫。